



FUOTBAL FERBYNT 2018

Un torneu di balon unic a Leeuwarden, Capitâl europeane de culture 2018: e se e partecipàs ancje une squadre zovanîl furlane?

La societât di balon Blauw Wit '34 e je daûr a meti adun un torneu internazionâl a Leeuwarden (tai Paîs Bas) par fantats sot dai 15 agns in program tal Istât dal 2018.

Ma parcè chest interès par un torneu di balon under 15 fat tal

Nord de Europe? Parcè che chest event al è pardabon speciâl: cun di fat si trate di une iniziative dedicade a scuadris dai 16 Paîs europeans li che a son feveladis lenghis minoritariis, e duncje ancje aes scuadris di cjase nestre!

Leeuwarden e je la capitâl de provincie de Frisie (Friesland), cun 120.000 abitants, decretade tant che Capitâl europeane de culture pal 2018.

Là vie e je presente la lenghe frisone, lenghe gjermaniche fevelade di plui o mancûl mieç milion di personis intes zonis

costieris meridionâls dal mâr dal Nord intai Paîs Bas, in Gjermanie, in Belgjiche e Danimarce. La lenghe frisone e je ricognossude tant che lenghe minoritarie in Gjermanie e e costituis une des dôs lenghis uficiâls de provincie de Frisie intai Paîs Bas.



In cheste suaze culturâl prestigjose, il zûc dal balon al devente leam fuart jenfri zovins che a condividin la divignince di teritoris caraterizâts di lenghis di minorance, duncje une ocasion di scambi, di confront e ancje di cognossince reciproche graciis al sport.

A mancjin 400 dîs prime di

dâ la prime pidade al balon in chest torneu, ma la machine operative e je za partide. La organizazion e à za cjapât contat cu lis realtâts istituzionâls che tal Vieri Continent a stan daûr a chestis cuistions par cirî jutori tal stiçâ il mont sportîf locâl e vè une rispueste grande. Tal câs dal Friûl al è stât domandât ae Agenzie Regionâl pe Lenghe Furlane di pandi la gnove cu la sperance di vè la presince ancje di une rapresentance furlane.

In pali e je la "Mienskipscup" ("mienskip" al vûl di "comunitât" in Frison, concet che al è ae fonde di "Leeuwarden, Capitâl europeane de culture 2018", e che i promotôrs de candidature a àn doprât par promovi e presentâ une societât vierte che e rive a cjapâ dentri svariadis comunitâts). I fantats si cjataran tai Paîs Bas tal completès sportîf Wiarda a Leeuwarden dai **15 ai 18 di Jugn dal 2018**.



Lis scuadris partecipantis a staran ali par trê dîs, di vinars

dopomisdì a lunis a buinore, in tendis montadis tai cjamps sportîfs dal Blauw Wit '34.

Gulizion, gustâ e cene a vignaran furnîts cence spesis adun cuntun program culturâl e di intratigniment pensât di pueste. A vignaran cuvierts i coscj par scuadris cun 20 personis (zuiadôrs e alenadôrs). L'unic cost al sarà chel dal traspuart fin a Leeuwarden. Dutis lis informazions e lis modalitâts di iscrizion si cjatin a cheste direzion internet <https://fuotbalferbynt.nl/>

Cu la sperance che une squadre furlane e rivi a jessi presente in chest contest multilinguistic e multicultural, al sarès di tacâ a organizâ achì in Friûl un torneu che al cjapi dentri scuadris che a rapresentin lis minorancis di chest cjanton di Europe: furlane, slovene e todescje, parcè che, ancje ca di nô, il balon al fevele lis lenghis de Europe.

Elena Zanussi

Par informazions:
www.arlef.it
arlef@regione.fvg.it
tel. 0432/555812

Par cure de:

